



## **Sulinermik Inuussutissarsiuqartut Kattuffiata**

24'ssaannik ataatsimeersuarnera

29.-31. oktobari 2025

Hotel Arctic, Ilulissat

***Aalajangiinernik imaqarniliaq***

## Oqaaseqarsinnaallutillu taaseqataasinnaasut

**Siulersuisuunerit** Siulittaasoq Jess G. Berthelsen  
Siulittaasup tullia Jokum Zeeb  
Else Jonna Lange  
Sofie Svendsen  
Ludvig Larsen  
Nuunu J. Jerimiassen  
Peter B. Mølgaard  
Qulutanguaq Berthelsen  
Pele-Knud Mathiessen

**Peqatigiiffiit aallartitaat** Nuuk: Emma J. Dalager  
Nuuk: Arnaq Johansen  
Nuuk: Karen N. Petersen  
Nuuk: Jens Kristian Kâjangmat  
Ilulissat: Aka M. Kristoffersen  
Ilulissat: Alma B. Siegstad  
Ilulissat: Pítánguak Kleist  
Sisimiut: Helene Sofie Olsen  
Sisimiut: Magdalene Marcussen  
Sisimiut: Maline Temothæussen  
Asiaat: Qujana Fleischer  
Asiaat: Nikolaj Søholm  
Upernavik: Ane-Marie Havmøller-Jørgensen  
Upernavik: Paninguaq Grim Jensen  
Uummannaq: Frederik Kristiansen  
Uummannaq: Andrea Broberg  
Maniitsoq: Elisabeth L. Hansen  
Maniitsoq: Hans Heilmann  
Qaqortoq: Arne Møller  
Qeqertarsuaq: Niels Wille  
Qasigiannuguit: Gaba Rosbach  
Narsaq: Benjamin Kielsen  
Paamiut: Debora Elisassen  
Nanortalik: Otto Lundblad  
Qaanaaq: Pualuna Kivioq  
Tasiilaq: Jens Nuka Poulsen  
Kangaatsiaq: Åge Motzfeldt  
Ikerasak: Michael Jakobsen  
Kangaamiut: Ulrik Lyberth  
Kangerlussuaq: Stina Steenholdt-Sørensen  
SIK-p Inuusuttai: Thrune Johansen  
SIK-p Inuusuttai: Avatanguaq Qujaukitsoq  
(Katillugit: 41)

### **1.1. Ataatsimeersuarnerup ammarneqarnera**

*Siulittaasup* Jess G. Berthelsenip ataatsimeersuarnerup ammarnera nalunaarutigaa tikilluaqqusil-lunilu ataatsimeersuarianut tamanut kiisalu SIK-mut ataqqinaammik ilaasortanut Beathe Hendrik-senimut Anda Kristiansenimullu.

Siulittaasup kissaateqarneratigut SIK-mi suleqataasimasut kingullertigut toqkukut qimagussimasut minutsimi ataatsimi nipaallisimanikkut eqqaaniarneqarput.

Ammaanermi najuuttut uku oqaaseqarnissaannut periarfissinneqarput: Sulisoqarnermut naalak-kersuisoq Bentiaraq Ottosen, aningaasaaqarnermut naalakkersuisoq Múte B. Egede, kommunalbe-styrelsimut ilaasortaq Sakio Fleischer aamma Baskerit nunaanni sulisartut kattuffiannit tikeraartoq Koldo Saenz.

### **2.1. Aqutsisussamik toqqaaneq**

*Nukaraq Eugenius* toqqaarneqarpoq.

### **3.1. Imaqarniliortussamik toqqaaneq**

*Svend Møller* toqqaarneqarpoq.

### **3.2. Taasinernik kisitsisussamik toqqaaneq**

SIK-p allattoqarfiani atorfillit uku taasinernik nakkutilliisussatut toqqaarneqarput: *Inge Lennert, Dor-thea Josefsen* aamma *Aviaq Petersen*.

### **4.1. Ullormut oqaluuserisassat akuerineqarnerat**

Karen N. Petersen (Nuuk) isumaqarpoq § 3 imm. 1-imi oqaatsip ”soraarnerussutisiallit” peerneqar-nissaanik peqatigiiffiup siunnersuutaa 7.1.2 piiginnarneqarsinnaasoq, siulersuisuunerit allannguu-tissanik siunnersuutaannut ilaareermat. Peerneqarporlu.

Ullormut oqaluuserisassat sinneri saqqummiunneqarnermissut isikkoqartillugit *akuersissutigineqarput*.

## **5. Siulersuisuunerit nalunaarutaat**

### **5.1. Siulersuisuunerit nalunaarutaata saqqummiunneqarnera**

Siulersuisuunerit nalunaarutaat ataatsimeersuarnissaq qaammammik ataatsimik sioqqullugu imikkooortortaqaarfinnut saqqummiunneqarsimasoq *siulittaasup* saqqummiuppaa nalunaarusiap imarisaanik eqikkaalluni malittarinneqquillunilu oqalugiaammuni.

### **5.2. Siulersuisuunerit nalunaarutaata oqallisigineqarnera**

Siulersuisuunerit nalunaarutaat ataatsimut isigalugu nalilerneqarneqarpoq oqaatsit imaattut atorlugit: Imartooq, suliarilluagaasoq.

Tamatuma saniatigut qqaaseqartunit maluginiarneqartut qaffakaatinneqartullu ilaatigut makkuupput:

- Kattuffiup allattoqarfiani sulisut "ajaappiaalluarput", saaffigiuminarlutik sullisilluarlutillu.
- Avataanit suliarortut amerligaluttuinnarput. Tamatumali peqatigigisaanik nuqaavissut sulisussanik pisariaqartitsiffiusunut eqaannerusumik nuukkallarsinnaanerannut ilaatigut akornutaapput boligstøtte atorlugu inissiat imaan-naq qimakkallarneqarsinnaasannginnerat, tamatumani inatsisit malittarisassallu allangortinneqarnissaat sulissutigisariaqarsinnaavoq.
- SIK-mut ilaasortat 300-nik amerlanerulernissaat siunissaq qaninnerusoq eqqarsaatigalugu siulersuisuunerit anguniagaannut ilaasimavoq, iluatsinngitsorli. Tamatumani erseqqissumik periusissiorortoqarsimanerpoq, tamanna siulersuisuunerit nalunaarutaanni erseqqinnginnami.
- Inuusuttut sulisartut katuffiannik ingerlatitseqqittussat tikillugit ilaasortasarsiorfigissagaanni ilisimasariaqarpoq ullumikkut inuusuttut "mobiiliniim-mata", tassa internetsikkut app-itigullu attaveqaatinik sullissivinnillu nakkus-siummata atuisuullutillu. Periusissiornermi, tamannalu tunngavigalugu

kattuffiup inuusuttunut siunnersortimik atorfinitsitsisinnaanerani, tamanna aallaaviusariaqassaaq.

- Kommuninut 17-iusunut aqqissugaanermut uteqqissinnaanermut siulersuisuunerit mianersoqqussuteqarnerannut tunngatillugu oqaaserineqartut amerlanngitsut ilaat: Kommunerujussuanngorsimasut ilaat maanna ooriitaa-ruteqqavoq. Kommunillu aqqissugaanerat oqallisigineqartillugu illua'tungeri-issillugit oqimaalutagassaapput mikisunik inuit tikivillugit ingerlatsiviusunik kommuneqarneq, angisuunillu kommuneqarneq atorfilinnit aqunneqarneru-soq.
- Teknikerit Danmarkimi Teknisk Landsforbundimut ilaasortaasut nunatsinnili sulisut SIK-mit isumaqatigiinniunneqartalerannut tunngatillugu taaneqar-poq tikisitat nunatsinni sulisuusut tamarmik SIK-p isumaqatigiissutaanut ilaanissaat anguniagaasoq.
- Ilaasortaanermut akiliuteqartarnermi aqqissuussinerit pisariillisarlugillu aala-jaallisarneqarnissaat pisariaqavippoq, tamatumani sorunami pineqarmat peqatigiiffiit kattuffiullu aningaasaqarnikkut ingerlalluarnissaat.
- Sulisartut peqatigiiffianni ilaasortatut taarsigassarsinissamut peqatigiiffeqaler-nissaq (låneforening), ilaasortanut iluaqutissatut aqqissuussineq kattuffinni kattuffiit ilaanni ilisimaneqartoq, anguneqaqqajaalersoq ilisimatitsissutigine-qarpoq.
- Ataatsip maluginiarpaq siulersuisuunernut ilaasortaasut ilaasa tamarmik im-mikkut partiinik tunuliaqutaqarlutik Inatsisartunut qinigassanngortissimane-rat – qujanarmigooq qinigaanngimmata, imaallaammigooq kattuffimmi sullis-sussaaruutissanngilagut! Allap maluginiarsimavaa siulittaasup partiimut Siu-mumut ilaasortaanini pillugu ajorineqartarnera, pingaarnerusorli tassaasoq inunnik sullisserusuttuunissaq.
- Siulersuisuunerit suliffeqarfinnut, ilinniarfinnut il.il. pulaariartuutigalutik sine-rissami illoqarfinnut nunaqarfinnullu ornigullutik ataatsimiigiartarnerat nuan-narineqartorujussuuvoq (ingerlatiinnagassaqqissoq). Peqatigiiffiillu kaammata-torusunnarput pulaakkat attaviginiartuarnerisigut malittarinneqqittaqqullugit.
- Ilaasortat ilaat SIK-mut ilaasortaasorisarput akissarsiamik allagartaasigut taku-sinnaagaangamikku soraarnerussutisiassanik aningaasaateqarfimmut SISA-mut akiliioraallutik. Tamatumani erseqqinnerusumik paasissutissiinissaq pisa-riaqartoq malunnarpoq.
- Sulilluartunut tapiissutit (stabilitetstillæg) Kommuneqarfik Sermersuumi ator-neqalersimasut aalajaannerusumik sulisoqarnissamut aqqissuussinertut ilua-tinnarput, ilaatigulli iluaqutaasimanngimmata peerneqarnissaat

isumaliutaalluni.

- Inuusuttunnguit sulinatik angerlarsimaannartut, soorlu aalisakkerivimmi sulisussaaleqineqaraluartoq aggerneq ajortut, maluginiarneqartaannarput. Kajumissaarneqarnissartik, pisinnaanerminnillu (nallinnartuunnginnerminnik) tusartinneqarnissartik pisariaqartippaat. Aammali sullivinni pissutsit kajumissinangitsut – nakkarsaanerit, aqutsisulunneq il.il. – iluarsiniagassaapput. Tassami ajortumik aqutsisoqaraangat sulisut paarlakaatiinnalersartut naluneqanngilaq.
- Aalisakkeriviit SIK-p ilaasortaqaqfigilluarpai, maluginiarneqarsimavorli aalisakkeriviit ilaanni tunisassiat suliarineqarsinnaagaluartut Danmarkiliaanneqartalersimasut. Siulittaasup tamanna misissorneqartariaqartippaa. Tassami aamma siusinnerusukkut malunnarsimmat Royal Greenland Kiinamiunik sulisussaminik tikisitsuaannalersoq, tamanna SIK-mit tunngavilersukkamik uparuartorneqarpoq, tamatumalu kingorna malunnartumik pitsaanerusumik aqqissuussisoqarluni.

## **6. 1. Naatsorsuutit kukkunerisukkat ilisimatitsissutitut saqqummiunneqarnerat**

*Siulittaasoq* saqqummiussivoq ukiunut sisamanut naatsorsuutinin kukkunerisukkanik 1. januaari 2021-mit 31. decembari 2024-mut tunngasunik. Oqimaatigiissitsinermi kisitsisit pingaarnerit nassuiarpai. Kattuffiup aningaasaqarnikkut ingerlanneqarnera kusanarpoq, tamatumani aningaasaqarnermut akisussaasoq allattoqarfimmilu pisortaq immikkut taallugit nersualarpai.

Naatsorsuutit ilisimatitsissutitut saqqummiunneqarnerat ersaartaannikkut ataatsimeersuutunit akuersaarneqarpoq.

## **7. Siunnersuutit tiguneqarsimasut oqaluuserineqarneri**

### **7.1. SIK-p inatsisaanut allanngutissatut siunnersuutit**

#### **7.1.1. Siulersuisuunerit SIK-p inatsisaanut allanngutissatut siunnersuutaat:**

a)

**SIK-p Inuusuttaasa atorunnaarsinneqarnissaanik siunnersuut**

*Siulittaasoq*: Inuusuttunut immikkoortortaarfik 2013-imi pilersinneqartoq naammaginatut siunertamullu naapertuuttumik ingerlasimangitsutut annikitsuinnarmillu kinguneqarsimasutut siulersuisuunerit nalilerpaat, taamaattumillu innersuussutigaat immikkoortortaarfik atorunnaarsinneqassasoq.

Tamatumunnga taarsiullugu inuusuttunut tunngatillugu allatut iliuusissanik pilersaarusiortoqarnissaa kaammattuutigineqarpoq, soorlu siullermik SIK-p allattoqarfiani inuusuttut pillugit siunnersortimik atorfinitsitsisoqarneratigut.

*Thrune Johansen* (SIK-p Inuusuttai): SIK-p Inuusuttaasa immikkut ittumik ataatsimeersuarnerminni siulersuisuunerit siunnersuutaat akerlilerpaat, isumaqaramik SIK-p Inuusuttai periarfissinneqarunik ingerlaqqissinnaasut, allatulluunniit periarfissanik allanik ujartuinnikkut aqqissuunneqarlutik.

*Benjamin Kielsen* (Narsaq): Siulersuisuunerit siunnersuutaat akerlereqqaaraluariallugu eqqarsaatigillualerlugu tapersersulerparput, ilumummi inuusuttut nalinginnaasumik peqatigiiffeqarnikkut katersoruminaammata. Inuusuttut mobiliniipput, qarasaasiatigut attaveqaatit nutaat atorlugit tikitassaapput.

*Nikolaj Spholm* (Aasiaat): Siunnersuut Aasianni peqatigiiffimmi siulersuisut sulisullu sinniisaasa oqallisigigamikku akerlilerniarlugu aalajangerput, inuusuttunullu siunnersortimik atorfinitsitsisoqarnissaa tapersersorpaat.

*Alma B. Siegstad* (Ilulissat): Siunnersuut itigartinniarparput, siunnersortip ataatsip suliassaq naammassisinaanaviangimmagu.

*Pele-Knud Mathiassen* (siulersuisuunernut ilaasortaq): Siunnersuummi taaneqartutut ukiumut 500.000 kr. sinnerlugit SIK-p Inuusuttaanut aningaasaliissutaasartut atorluarneqarnerulissapput siulersuisuunerit siunnersuutaat malillugu aalajangerutta.

*Aqutsisup* siulersuisuunerit siunnersuutaat taasisitsissutigaa:

Akerliusut 5. Isumaqaataasut 33. Taaseqataangitsut 3. *Siunnersuut akuerineqarpoq*. Taamaalillutik ataatsimeersuarnermi taasisinnaasut aallaqqaammut 41-usut 39-nngorput, SIK-p Inuusuttaasa atorunnaartut aallartitaat marluk peermata.

**b)**

**§ 1, imm. 2:** "SIK-p allattoqarfia Nuummi najugaqarfeqarpoq" allangortinneqassaaq imaalillugu: "Kattuffik Nuummi inissisimavoq".

*Akuerineqarpoq.*

**§ 3, imm. 1:** "Soraarnerussutisiallit" aalajangersakkamut ilaajunnaassapput.

Erseqqissaaffiusumik oqallisigineqarpoq. Kikkut ilaasortanngorsinnaanerannik aalajangersakkami tassani soraarnerussutisiallit immikkut taasariaqannginnerannut ilaatigut pissutigineqarpoq soraarnerussutisiallit namminneq peqatigiiffeqareernerat, pisinnaatitaaffitik pillugit siunnersortisarsiorfigisinnaasaminnik. Aamma soraarnerussutisiallit minnerusumik akiliuteqarlutik SIK-mut ilaasortaasinnaanerat tamatumuuna allanngortinniarneqanngilaq.

*Aqutsisup paaserusuppa kikkut siunnersuummut akerliunersut aamma isumaqataanersut: Amerlanerussuteqarluartut isumaqataapput.*

**§ 3, imm. 2 aamma imm. 3:** Aalajangersakkat taakku peerneqassapput.

Oqaaseqarfigineqarnani *akuerineqarpoq.*

**§ 4, imm. 1:** SIK-p Inuusuttai § 4-mit peerneqassapput, taamaalillutillu SIK-p aqqissuussaananerani immikkoortortatut atorunnaassallutik. Tamatuma kingunerisaanik "SIK-p Inuusuttai" malittarisasani aalajangersakkanit tamanit peerneqassapput.

Siuliani aalajangiineq innersuussutigalugu oqaaseqarfigineqarnani *akuerineqarpoq.*

**§ 4, imm. 2:** Aalajangersagaq nutaajuvoq, SIK-p allattoqarfiata kattuffiup ingerlataqarfiinut assigiinngitsunut ilaasortanullu tunngatillugu sunik suliassaqarneranik ersersitsisoq.

Immikkut oqaaseqarfigineqarnani *akuerineqarpoq.*

**§ 5, imm. 2:** "Ataatsimeersuarneq septembarimi oktobarimiluunniit pisassaaq ..." allanngortinneqassaaq imalillugu: "Ataatsimeersuarneq aggustimi, septembarimi oktobarimiluunniit pisassaaq ...".

Immikkut oqaaseqarfigineqarnani *akuerineqarpoq*.

**§ 7, imm. 1:** "Ilaasortat 35-nit 250-inut: Aallartitaq 1" allangortinneqassaaq imaalillugu: "Ilaasortat 50-init 250-inut: Aallartitaq 1".

Siulersuisuunerit siunnersuutertik *tunuartippaat* – tassa peqatigiiffiup SIK-mi peqatigiiffittut ingerlanneqarsinnaassaguni ikinnerpaamik 35-nik ilaasortaqaarnissaanik aalajangersakkap atuuttup minnerpaamik 50-inik ilaasortaqaarnissaanik allangortinneqarnissaanut siunnersuummut atammat, tamannalu ataatsimeersuartut akornanni annertuumik akerlerineqartoq paasinarsimmat – aamma takukkit § 27 imm. 1-ip aamma § 32-p allangortinneqarnissaannik siunnersuutit.

**§ 8, imm. 1:** "Pisinnaatitsissuteqarnikkut imaluunniit allakkatigut taasisoqarsinnaanngilaq" allangortinneqassaaq imaalillugu: "Aallartitat, soorlu taaseqataasarsinnaassagunik, ataatsimeersuarnermut ornigullutik peqataassapput".

Annerusumik oqaaseqarfigineqarnani *akuerineqarpoq*.

**§ 9, nr. 8:** "Ukiuni tulliuuttuni marlunni ilaasortat kattuffimmut akiliutissaasa aalajangerneqarnerat" allangortinneqassaaq imaalillugu: "Ilaasortaanermut akiliutit aalajangerneqarnerat".

*Akuerineqarpoq*.

**§ 9, nr. 9 aamma 10:** "Kukkunersiuisumik akuerisaasumik toqqaaneq" nr. 9-tut inissinneqarpoq, taavalu "Siulersuisuunissanik qinersineq" nr. 10-tut inissinneqarluni.

*Akuerineqarpoq*.

**§ 15, imm. 2:** Tassani una ilassutaavoq: "Siulersuisuunerit immikkut ittumik ataatsimeersuarnissaq ullulissavaat".

*Akuerineqarpoq.*

**§ 15, imm. 4:** Maannakkutut qaammatinik marlunnik sioqqutsilluni nalunaaruteqaqqusinermit taarsiullugu nutaamik ima aalajangersagaqalissaaq: "SIK-p allattoqarfiata aalajangissavaa aallartitassanik nalunaaruteqarnissaq tamanna kingusinnerpaamik qaqugu pissanersoq".

*Akuerineqarpoq.*

**§ 15, imm. 5:** "Siulersuisuunerit aalajangersinnaapput immikkut ittumik ataatsimeersuarneq telefonikkut imaluunniit allakkatigut ingerlanneqassasoq" allangortinneqassaaq imaalillugu: "Siulersuisuunerit aalajangissavaat immikkut ittumik ataatsimeersuarneq ornigulluni, telefonikkut imaluunniit qarasaasiatigut ingerlanneqassasoq".

*Akuerineqarpoq.*

**§ 16, imm. 1,** titarnertaaq kingulleq: "Ukiuni tulliuuttuni marlunni ilaasortat kattuffimmut akiliutissaat aalajangiiffigissallugit" allangortinneqassaaq imaalillugu: "Ilaasortat kattuffimmut akiliutissaat ataatsimeersuarnermi aalajangikkat allangortinneqassanersut aalajangiiffigissallugit".

*Akuerineqarpoq.*

**§ 16, imm. 2:** Aalajangersagaavoq nutaaq nakkutilliisoqarfiup qaqugu ataatsimiissaneramik siulersuisuunerit aalajangiisnaatitaanerannik.

*Akuerineqarpoq.*

**§ 19, imm. 1:** "Pisinnaatitsissuteqarnikkut imaluunniit allakkatigut taasisoqarsinnaanngilaq" allangortinneqassaaq imaalillugu: "Aallartitat, soorlu taaseqataasarsinnaassagunik, Nakkutilliisoqarfiup ataatsimiinneranut ornigullutik peqataassapput".

*Akuerineqarpoq.*

**§ 20, nr. 8:** "Ilaasortat akiliutissaasa ukiunut tulliuuttunut marlunnut aalajangerneqarnerat" allannngortinneqassaaq imaalillugu: "Ilaasortat akiliutissaasa ataatsimeersuarnermi aalajangikkat allannngortinneqarsinnaanerat".

*Akuerineqarpoq.*

**§ 24, imm. 2, oqaaseqatigiit aappaat:** "Tamakkua saniatigut telefonikkut imaluunniit allakkatigut ataatsimiittoqarsinnaavoq" allannngortinneqassaaq imaalillugu: "Tamakkua saniatigut pisariaqartit-sineq naapertorlugu telefonikkut imaluunniit qarasaasiakkut allakkatigulluunniit ataatsimiittoqarsinnaavoq".

*Akuerineqarpoq.*

**§ 24, imm. 3:** Oqaatsit kingullit atorneqartut "ukioq missingersuuteqarfiusoq tulliuuttoq" allannngortinneqassapput imaalillugit: "qaammatisiutit ukiuat tulliuuttoq".

*Akuerineqarpoq.*

**§ 27, imm. 1:** "35" allannngortinneqassaaq imaalillugu: "50". Taava illoqarfimmi nunaqarfimmiluunniit peqatigiiffik ikinnerpaamik 50-inik ilaasortaqaassaaq SIK-mi peqatigiiffittut ingerlanneqarsinnaassaguni.

Siulersuisuunerit siunnersuutertik *tunuartippaat*.

**§ 31, imm. 1:** Nakkutilliisoqarfik aalajangersakkamit peerneqassaaq, taamaalilluni taamaallaat kattuffiup ataatsimeersuarnerani peqatigiiffimmik SIK-mut ilaajunnaarsit-sisoqarsinnaanngorlugu, peqatigiiffik SIK-p inatsisaanik unioqutitsisimappat. Taamaalilluni imm. 2-mi aamma imm. 4-mi oqaaseq "nakkutilliisoqarfik" peerneqassaaq.

*Akuerineqarpoq.*

**§ 32:** § 27 imm. 1-imi "50"-inngortitsinerup kingunerisaanik paragrafimi tassani imm. 1-imi aamma imm. 2-mi allassimagaluartoq "35" allannngortinneqassaaq "50"-inngorlugu.

Siulersuisuunerit siunnersuutertik *tunuartippaat*.

**§ 36:** SIK-p Inuusuttai pillugit aalajangersakkat malittarisassanit peerneqassapput. Tamatuma kingunerisaanik § 37 tassaalissaaq § 36, malittarisassanilu aalajangersakkat sinnerisa kisitsisitaat taamatuttaa nikissallutik.

*Akuerineqarpoq.*

**§ 37, imm. 1, maanna § 36-nngortoq:** "Siulersuisuunerit" imm. 1-imi marloriarlutik taaneqartut imaalerput: "Ulluinnarni aqutsisut". Taamaalilluni ima allassimasoqalerpoq: "... isumaqatigiinniarnerit sioqqulluarlugit ulluinnarni aqutsisut peqatigiiffinnut SIK-mut atasunut aamma sulisut sinnisaannut siunnersuutaasinnaasunik tusarniaasinnaapput. Peqatigiiffiit sulisullu sinniisaasa siunnersuutaat tigusatik ulluinnarni aqutsisut oqallisigalugillu pingaarnersiorlugit tulleriiaassavaat."

*Akuerineqarpoq.*

**§ 40, imm. 2, maanna § 39, imm. 2-nngortoq:** Ima allassimagaluartoq: "Kattuffiup naatsorsuutai siulersuisuunernit akuersissutigineqassapput, tamatumalu kingorna ataatsimeersuarnermi ilisimatitsissutitut saqqummiunneqassallutik. Peqatigiiffiit naatsorsuutaat peqatigiiffinni siulersuisunit susassaqtartunit akuersissutigineqassapput" allanngortinneqassaaq imaalillugu: "Kattuffiup naatsorsuutai siulersuisuunernit akuersissutigineqassapput, tamatumalu kingorna ataatsimeersuarnermi imaluunniit nakkutilliisoqarfimmut ilisimatitsissutitut saqqummiunneqassallutik. Peqatigiiffiit naatsorsuutaat peqatigiiffinni siulersuisunit susassaqtartunit akuersissutigineqassapput, kingornalu peqatigiiffiit ataatsimeersuarnerini ilisimatitsissutitut saqqummiunneqartassallutik".

*Akuerineqarpoq.*

**7.1.2 SIP Nuuk:** § 2-mi allaqqasup: "Soraarnerussutisiaqalersarnermik aqqissuussinikkut utoqqaliner-mi inuuniarnikkut atugarisanik pitsanngorsaaniisaaq", peerneqarnissaanik siunnersuut. Tassungalu malitsigitillugu aamma § 3 imm. 1-imi imm. 3-milu oqaatsip soraarnerussutisiiallit peerneqarnissaa.

Ullormut oqaluuserisassat akuerineqarnerannut (4.1) atatillugu taanna peerneqarpoq, siulersuisuunerit siunnersuutaannut ilaareemat.

**7.1.3 SIP Nuuk aamma SIP Nanortalik:** § 7 Nakkutilliisoqarfimmut / Ataatsimeersuarnermut aallartitat amerlassusiannik aalajangersaariaatsip allangortinneqarnissaa anguniarlugu siunnersuusiortoqarnissaanik siunnersuut.

*Jens Kristian Kâjangmat* (Nuuk): Nunatsinni innuttaasut ikiliartuinnartillugit Nuullu inuttusiartuinnartillugu naatsorsuutigilissanerparput siunnessami Nuuk kisiartaalluni sisamanik aallartitaqartuasasooq peqatigiiffiillu sinneri ataatsimik? Ataatsimeersuarneq aaqqissuusseqqinnissamik suliakkiisariaqarpoq ataatsimeersuarnissap tullianut isummerfigisassamik, peqatigiiffeqarneq aallartitaqartarnerlu illersorsinnaajumallugit.

*Otto Lundblad* (Nanortalik): Naligiinnerusumik peqataatitaqartarnissaq siunnersuutigaarput. Illoqarfinnut annerusunut nuuttartut amerliartortillugit aallartitatut minnerusunit peqataatinneqartartut nikinnaviangillat, imaluunniit illoqarfiit anginerusut peqataatittagaat amerliartuinnassapput.

*Siulittaasoq:* Siulersuisuuninngortussat ataatsimiititaliorlit tullianik ataatsimeersuarnissamut siunnersuuteqartussanik.

*Qujana Fleischer:* Ataatsimiititaliornissaq kinguarsaataaginnassannginnerpa?

*Helene Sofie Olsen:* Ataatsimiititaliornissaq akerleraarput, siunnersuut massakkut aalajangiiffiqineqanngippat aatsaat ukioq arfineq-pingasut qaangiuppata aalajangiisoqassammat.

*Siulittaasup tullia:* Inassutigaarput ataatsimiititaliortoqassasooq, Nakkutilliisoqarfiullu tullianik ataatsimiinnissaani suliaq killiffissiorneqarumaartoq.

*Aqutsisoq:* Siulittaasup tulliata inassutigisaatut suleriaaseqarnissaq *amerlanerit akuerigaat* malugisinnaavara, taamaassarlu.

**7.1.4 SIP Ilulissat:** § 8 imm. 1-imi oqaaseqatigiit ima allangortinneqarnissaannik siunnersuut: *”Ataatsimeersuarnermi aalajangiinerit amerlanerussuteqarnikkut pisassapput, peqataasullu tamarmik isummaminnik taaseqataasinnaapput nammineq isummatik atorlugit. Qinersinermi taasinerinik naligiittoqartillugu taakkunani qinarseqqittoqartassaaq.”*

*Pîtánguak Kleist:* Siunnersuummik saqqummiussivoq, nammineq isumaq naapertorlugu taasisarnissaq pingaartillugu, assigiimmik periarfissaqartitaasariaqaratta.

*Sofie Svendsen* (siulersuisuunerit sinnerlugit): Siunnersuut siulersuisuunernit taparserneqanngilaq, siulersuisuunerni amerlanerussuteqarnikkut aalajangikkat tunngavigalugit ataatsimoortumik

saqqummiussisaratta. Siunnersuutigineqartoq periaatsitit tunngavigilissagutsigu tukattorujus-suarmik inississinnaavugut.

*Aqutsisoq* taasisitsivoq. Akerliusut 24. Isumaqaataasut 8. Taaseqataangitsut 7. Siunnersuut *itigartinneqarpoq*.

**7.1.5 SIP Nuuk:** Allaqqasoq *"Ukiuni tulliuuttuni marlunni ilaasortat kattuffimmut akiliutaasa aalajangersarneqartarnerat"* allanngortinneqassooq imaalillugu: *"Ukiuni tulliuuttuni sisamani ilaasortat kattuffimmut akiliutissaasa aalajangersarneqartarnerat"*. Taassumalu malitsigisaanik § 16-imi allaqqasoq imaattoq peerneqassaaq: *"Ukiuni tulliuuttuni marlunni ilaasortat kattuffimmut akiliutissaasa aalajangissallugit."*

*Karen N. Petersen* saqqummiussivoq. Tunngalersuutigaa kattuffimmut akiliutit ataatsimeersuarnermi, Nakkutilliisoqarfimmiunngitsoq, aalajangiiffigissallugit tulluarnerusoq.

*Ludvig Larsen* (siulersuisuunerit sinnerlugit): Siunnersuut siulersuisuunerit *akuersaanngilaat* maannakkullu tamatumani aalajangersagaasut atuutiinnarnissaat kissaatigalugu, aammami ataatsimeersuarnerit akornanni piffissap qiteqqunnerani akiliutit isummerfigeqqinnissaat pisariaqalersinnaasarmat.

*Aqutsisoq* paasiniaavoq kikkut siunnersuummut isumaqaataansut. Qulingiluat nappaapput. Taamalu *amerlanerussuteqarluartut* akerliupput.

**7.1.6 SIP Ilulissat, SIP Qaanaaq aamma SIP Narsaq:** § 10 imm. 4-p peerneqarnissaa. (*"SIK-p siulittaasussaatur qinigassanngortitat SIK-p allattoqarfianut nalunaarutigineqassapput ataatsimeersuararnissaq kingusinnerpaamik qaammatinik 3-nik sioqqullugu."*)

*Pitánguak Kleist* (Ilulissat), *Pualuna Kivioq* (Qaanaaq) aamma *Benjamin Kielsen* (Narsaq) saqqummiussippat ilaatigut imaattunik tunngavilersuuteqarlutik: Kinaluunniit ataatsimeersuarnermi taasinnaasutut peqataasoq siulittaasussatut sassarsinnaasariaqartoq naligiissitaanerup aqqani ullormi ataatsimeersuarfimmi, soorlumi siulersuisuunernut ilaasortanngorusuttut ullormi tassani qinigassanngortissinnaasartut. Tamanna aamma siulittaasunngorniarnarup ammanerusumik unammillerfiunissaanut ammaassissaaq.

*Nuunu J. Jerimiassen* (siulersuisuunerit sinnerlugit): Siunnersuutip itigartinneqarnissaa inassutigaa. Maannakkut malittarisassani aalajangersarneqarsimasutut piffissaqarluarluni siulittaasutut qinigassanngortinnissaq tamat oqartussaaqataanerannik ataqqinninneruvoq – ilaasortanik

isumasiuinissamat piareersarluarnissamullu periarfissiigami. Aammami malittarisassaq taamaattoq sulisar-tut kattuffiini allani atornerqarpoq.

*Aqutsisoq* taasisitsivoq. Akerliusut 22. Isumaqaataasut 11. Taaseqataanningsut 6. Siunnersuut *itigartinneqarpoq*.

**7.1.7 SIP Nuuk:** § 10 imm. 4-p allannngortinneqarnissaanik siunnersuut ima ilillugu: SIK-p siulittaasusaatut qinigassannngortitat SIK-p allattoqarfianut nalunaarutigineqassapput ataatsimeersuarneris-saq kingusinnerpaamik qaammatinik 2-nik sioqqullugu.

*Jens Kristian Kâjangmat* saqqummiussivoq. Ullormi siulittaasussamik qinersiviusumi qini-gassannngortittoqarsinnaalernissaanik siornatigut siunnersuutaasimasoq Nuummit isumaqatigisi-manngilarput. Taamaattorli maanna siunnersuutiginiarparput piffissarititaasoq qaammatinut mar-lunnut sivikillineqassasoq.

*Pele-Knud Mathiessen* (siulersuisuunerit sinnerlugit): Siulersuisuunerit siunnersuut taanna taper-serpaat oqaluserisassani immikkoortup matuma siuliani kissaatigineqartunut naaperiaassutitut.

*Aqutsisoq* aperivoq siunnersuut akerlerineqarneris. Ataaseq akerliuvoq. *Aqutsisoq* inerniliivoq siunnersuut amerlanerussuteqarluartunit taper-sersorneqartoq, taamalu *akuerineqartoq*.

**7.1.8 SIP Ilulissat:** § 12 oqaaseqatigiit: "Aallartitat ataatsimeersuarnermi peqataasut siulersuisuunernut qinerneqarsinnaapput" allannngortinneqarnissaanik siunnersuut ima ilillugu: "Aallartitat ataatsimeersuarnermi peqataasut siulersuisuunernut qinerneqarsinnaapput, aamma siulittaasutut siulittaasullu tulliatut".

*Pîtánguak Kleist* saqqummiussivoq ima tunngavilersuilluni: Tamatta naligiikkatta ataatsimeersuar-nermilu oqartussaassuseqarnerpaasumi assigiimmik pisinnaatitaaffeqartariaqaratta.

*Aqutsisup* siuliini aalajangikkat erseqqissaatigineqartullu innersuussutigalugit siunnersuut isumaa-ruttutut taamalu qaangiinnarneqarsinnaasutut nalilerpaa.

**7.1.9 SIP Narsaq:** Malittarisassani allaqqasut ataatsimiinnerit "telefonikkut ingerlanneqarsinnaasut" allannngortinneqassasut imaalillugit "attaveqaatitigut ingerlanneqarsinnaasut" (§ 15 imm. 5 aamma § 24 imm. 2).

*Benjamin Kielsen:* Tunngavilersuivoq oqaatigalugu ataatsimiinnerit attaveqaatit nutaaliaasut atorlugit ingerlanneqartalersimammata aalajangersakkani oqaasertat allanngortiallannissaat kissaatiginartoq.

*Aqutsisoq:* Oqaasertat pineqartut teknikkikkut iluarsineqarnissaat akuerineqareerpoq.

#### **7.1.10 SIP Kangaamiut:** § 27-p attatiinnerneqarnissaanik kajumissaarut.

*Ulrik Lyberth:* Illoqarfinni nunaqarfinnilu peqatigiiffinni ilaasortat ikinnerpaamik 35-nik amerlasuseqarnissaanik aalajangersakkap attatiinnerneqarnissaa siunnersuutigaa, tassa peqatigiiffeqarneq kattuffimmi pingaaruteqartuarsimammata, peqatigiiffiillu ingerlasinnaasut iluatigisari-aqarmata.

*Aqutsisoq:* Kajumissaarutigineqartutut aaqqiisoqareerpoq.

#### **7.1.11 SIP Kangaamiut:** Soraarningorsimasut ¼-imik ilaasortaanermut akiliuteqartartut ilaasortariinnassagutsigit ilaasortatut allatulli periarfissanik atuisinnaanissaasa ammaanneqarnissaanik siunnersuut.

*Ulrik Lyberth:* Soraarnerussutisiaqartut ¼-imik akiliuteqatinneqarlutik SIK-mut ilaasortaaginnartut ilaasortatut sunik iluaqutissarsinersut ullumikkut takusinnaanngilarput. Ilaasortariinnassagutsigit ilaasortatut allatulli periarfissaqarnissaat ammaanniartigu, soorlu Isumaginninnermut Aningaasaateqarfimmut aamma Sulinngiffeqarluni Angalanermut Aningaasaateqarfimmut qinnuteqarsinnaaneq eqqarsaatigalugu.

*Siulittaasoq:* Ilumoorpoq soraarnerussutisiallit ilaasortatut allatulli pisinnaatitaaffeqanngimmata. Siunnersuutilli taamatut isikkoqartillugu akuerineqarnissaa siulersuisuunerit inassutigisinnaanngilaat, tassa Isumaginninnermut Aningaasaateqarfinnut aamma Sulinngiffeqarluni Angalanermut Aningaasaateqarfimmut qinnuteqarsinnaassagaanni aningaasaateqarfinnut taakkununga sulinermik inuussutissarsiuteqartutut akilersueqataanissaq piumasaqaataammat.

Unali eqqumaffigisariaqarpoq: Soraarnerussutisiaqalereeraluarluni saniatigooralugu suligaanni, namminerlu Isumaginninnermut Aningaasaateqarfimmut akilersueqataagaanni, aningaasaateqarfimmut tassunga qinnuteqartoqarsinnaavoq.

Aamma aningaasaateqarfimmi tassani aalajangersaasimavugut soraarnerussutisiaqalernerup kingorna qaammatit tallimat tikillugit aningaasaateqarfimmut qinnuteqartoqarsinnaasoq. Tamannali Sulinngiffeqarluni Angalanermut Aningaasaateqarfimmi sulii atuutilinngilaq.

*Siulittaasup tullia* (Sulinngiffeqarluni Angalanermut Aningaasaateqarfimmut siulittaasuusoq): Katuffiup siulersuisuuneri nutaat ivertinneqariarpata Sulinnigiffeqarluni Angalanermut Aningaasaateqarfiup siulersuisuuneri ilaasortaatitaalerumaartunut inassutigivarput aamma qaammatinik tallimanik aqqissuussineq aningaasaateqarfimmi atuutilersinniaqqullugu.

*Aqutsisoq* aperivoq kikkut siunnersuut itigartikkaat (siulersuisuuneri inassutigisaattut). Amerlanerussuteqarluartut *itigartippaat*.

## 7.2 Sulinnigiffeqarluni Angalanermut Aningaasaateqarfik

**7.2.1 SIP Aasiaat:** Ilaasortavut soraarninngorsimasut Sulinnigiffeqarluni Angalanermut Aningaasaateqarfimmut qinnuteqarsinnaalernissaannik siulersuisut misissuinnissaannik siunnersuut.

*Qujana Fleischer* tungavilersuivoq: Ukiorpasuarni ilaasortarisimasarpasuavut utoqqalinersiaqaleraangata tapersersuisutut ilaasortariaannarsinnaasarpavut, ajunngitsorsiassaqaqtissanagilli – inatsisitigut ikiortariaqarpata siunnersortarsinnaaneri eqqassanngikkaanni.

*Siulittaasooq:* Siornatigut periarfissaqarsimavoq aningaasaateqarfimmut akilersueqataanngikkaluartut qinnuteqarsinnaanissaannut, periarfissarli tamanna pisortat peertissimavaat. Aningaasaateqarfimmut siulersuisunngortussat kajumissaarpavut aqqissuussinerup tamatuma atuutilerseqqinneqarnissaa sulissutigeqqullugu aningaasanik utoqqalinersiaqalersimasunut atugassanik illikartitsinikkut.

*Aqutsisoq:* Aasiannit siunnersuut ataatsimeersuurtunit *tapersorneqarpoq*.

**7.2.2 SIP Qeqertarsuaq:** Qitornaq innarluuteqarpat 18-ileereeraluortorluunniit Sulinnigiffeqarluni Angalanermut Aningaasaateqarfimmut qinnuteqarnermi ilanngunneqarsinnaalernissaannik siunnersuut.

*Niels Wille* tungavilersuivoq, assersuutitut taallugit aappariit paneqartut annertuumik innarluutilimmik 20-liilivissumik, najugaqatigisaminnik. Aappariit feriefondimut qinnuteqassaarsimapput panitsik qimassinnaannginnamikkut. Siunnersuutigaa annertuumik innarluutillit suli angajoqqaaminni najugaqartut angalanissamik qinnuteqarnermi ilanngunneqarsinnaalernissaat.

*Sofie Svendsen* (siulersuisuuneri sinnerlugit): Siulersuisuuneri siunnersuut tapersorsorpaat aningaasaateqarfimmilu oqartussaasut siulersuisut aamma akuersaassagaat inassutigalugu.

*Emma J. Dalager:* Tapersorsorparput, aammali innarluutillit peqatigiiffiannik oqaloqatiginnissutigineqassasoq kaammattuutigalugu.

*Aqutsisoq:* Siunnersuut ataatsimeersuurtunit *tapersorsorneqarpoq.*

### 7.3. Isumaqatigiinniartarnernut tunngasut

**7.3.1 SIP Aasiaat:** SIK-p isumaqatigiinniartarnerata ukiunut marlunnut sivikillinissaanik siunnersuut.

*Qujana Fleischer:* Naluneqanngitsutut SIK isumaqatigiinniaraangami ukiunut sisamanut isumaqatigiinniartarpoq. Ukiuni kingullerni pisiassat, inuussutissat, ineqarneq, kiassarneq allallu ilaatigut ullormit ullormut annertuumik qaffattarput, aningaasarsiallu isumaqatigiissutaasimasut kinguussaasarlutik. Taamaattumik piffissaq isumaqatigiissuteqarfiusartoq ukiunut marlunnut sivikillisariaqarpoq.

*Ludvig Larsen (siulersuisuunerit sinnerlugit):* Piffissap isumaqatigiissuteqarfiusup ukiunik marlunnut sivisisussuilerneqarsinnaanera ammaffigaarput. Kisianni pituttornaveersaarnissaq pisariaqarpoq. Aamma ukiut pingasut periarfissaasinnaapput, apeqqutaalluni sulisitsisut qanoq neqeroorteqarnerisut. Taamattumik ukiunut marlunnut sivikilliliinissamut pituttoreernissaq siulersuisuunerit tapersersunngilaat.

*Aqutsisoq* aperivoq kikkut Aasiannit siunnersuummut isumaqataanersut: Marluk isumaqataapput. Amerlanerussuteqarluartut *akerliupput.*

**7.3.2, 7.3.4, 7.3.5, aamma 7.3.6:** Isumaqatigiinniutissatut oqaluuserisassanngortitat aalajangersimasut taakku oqaluuserisassat pappialartaannut ilanngunneqarsimasut SIK-p allattoqarfiatigut ingerlateqqitassanngortinneqarput.

**7.3.3 SIP Nuuk:** Isumaqatigiissutini tamani siulersuisut ataatsimiigiarsinnaatitaanerit periarfissinneqarli.

*Emma J. Dalager:* Peqatigiiffinni siulersuisuni ilaasortaqaarsinnaasarpoq piffissani nikerartuni sulisunik, ataatsimiigiarnissaminnullu sulisitsisuminnit itigartinneqarpata illersorsinnaanngilavut.

Taamaattumik siunnersuutigaarput isumaqatigiissutini tamani qinikkatut pisortanilu toqqakkatut suliaasaqartitaanermut aalajangersakkani immikkoortumik imaattumik erseqqissaataasumik ilanngussisoqarnissaa siunnersuutigaarput: "SIK-p peqatigiiffiini siulersuisut ataatsimiinneri piffissap suliffiup ingerlanerani suliffiulli avataani pisut, SIK-p peqatigiiffianit aaqqissuussaasut, suliffimmit qimagusimanissamik pisinnaatitsiffiupput akissarsiat tamakkiisumik pigiinnarlugit."

*Qulutannuaq Berthelsen* (siulersuisuunerit sinnerlugit): Siulersuisuunerit tamanna taperserpaat, kattuffiullu allattoqarfianut misissugassanngortillugu.

*Aqutsisoq*: Siunnersuut taamaatsillugu *tapersersorneqarpoq*.

#### 7.4 SIK-p ulluinnarni ingerlanneqarneranut tunngasut

**7.4.1 SIP Narsaq**: SIK-p namminermini app-eqalernissaanik sulissutiginninnissamik siunnersuut.

*Benjamin Kielsen*: Teknologiiip nutaap nalaani maanna inuusugut oqarasuaatit angallattakkat ulluinnarsiutigaavut, periarfissallu tassaniittut atorluarlugit inerisaalernissamut piffissanngorpoq. App-ip taassuma iluaniissapput SIK-p aningaasaateqarfiinut assigiinngitsunut qinnuteqarfissat allallu SIK-mut tunngasut.

*Pele-Knud Mathiessen* (siulersuisuunerit sinnerlugit): Siunnersuut taperserparput, aammalumi kattuffimmi sulissutigisassatut taaneqartunut ilanngunneqareersimavoq.

*Aqutsisoq*: Siunnersuut tapersersorneqarpoq.

**7.4.2 SIP Ilulissat**: Siulersuisuunerit ataatsimut isummertarnerata taasisarneratalu allanngortari-aqarnerannik namminerlu taasisinnaassuseqarnissaannik oqariartuut.

*Pitánguak Kleist*: Siusinnerusukkut sammineqareermat qaangiinnarsinnaavarput, kisianni siulersuisuunerni isummerfigeqqinneqarnissaa kissaatiginarpoq.

*Siulittaasup tullia*: Siulersuisuunerit siunnersuut tapersinngilaat.

#### 7.5 Siunnersuutit allat

**7.5.1 SIP Qasigianniguit:** Ajunaartoqartillugu toqunermut uppernarsaat aatsaat kingornarujuk pissarsiarineqarsinnaalertarsimammatt suliniutigisassatut siunnersuut.

*Gaba Rosbach:* Suliassaq Isumaginninnermut Aningaasaateqarfimmut tunnganeruvoq, tassa ilaqutaasut ornigunnissaminnut akiliunneqarsinnaanerannut, tamatumani nakorsap oqaaseqaataa utaqqineqartariaqartarmat. Ajunaartoqartillugu toqunermut uppernarsaat kingunerujussuatigut aatsaat pissarsiarineqarsinnaalertarsimavoq, immaqqa ukiup ataatsip missaa aatsaat qaangiukkaangat.

*Siulittaasoq:* Neriorsuutigisinnaavara politikernut ingerlateqqinneqassasoq.

*Emma J. Dalager:* Suliassani taamaattuni susassaartuutit tassaapput nakorsaqarfik, immaqalu politiit.

*Aqutsisoq:* Taamaatsillugu inatsisiliornermik suliaqartunut ingerlateqqitassaavoq.

**7.5.2 SIP Nuuk:** Nuummiumut peqqinnissaqarfeqalernissap suliniutigineqarnissaanik siunnersuut.

*Karen N. Petersen:* Sinerissami illoqarfinni peqqinnissaqarfiit tassaapput nunap immikkoortuini pineqartuni peqqinnissaqarfiit, Nuummili peqqinnissaqarfik tassaalluni nuna tamakkerlugu peqqinnissaqarfik. Tamanna Nuummi sulisartut ilaasortatta misigipiloorpaat, peqqinnissaqarfimmut saaffiginninnerminni ullormut nakorsiarnissaminnut periarfissaqartannginnamik, sianernerinnarmiluunniit utaqqisuni 100-ni inissisimasoqarsinnaasarluni. SIK-p politikikkut peqqinnissaqarfeqarneq eqqarsaatigalugu anguniartariaqarpaa immikkut Nuummi peqqinnissaqarfik pilersinneqassasoq, taamaalilluni Nuna Tamakkerlugu peqqinnissaqarfillu immikkuulersillugit.

*Else Jonna Lange* (siulersuisuunerit sinnerlugit): Peqqinnissamut kommissioni tamakkuninnga suliaqarpoq, suliassarlu tassaniippoq.

*Aqutsisoq:* Siunnersuut *itigartinneqarpoq*, suliassaq pineqartoq allanit ingerlanneqarmat.

**7.5.3 SIP Nuuk:** Inissaaleqinerup sumiluunniit malunnaatilimmik akiorneqarnissaanik siunnersuut.

*Jens Kristian Kâjangmat:* Nunatsinni sumiluunniit pisortat suliffiutaani sulisut inissaannik pilersitsisariaqarput, taamatullu aamma SIK-p politikikkut inuiaqatigiinni anguniakkani pimoorullugu sulissutigisariaqarpaa.

Tamanna pimoorullugu anguniarneqartariaqarpoq. Tassami takuneqartarpoq sulisut suliffimminni qiteqquttarfik angerlarsimaffimmik aappaatut atoraat eqqissisimaarfissaqarumallutik,

inisimasuuffitsik toqqisisimaffiginagu, aalakkuttut ikiarruttullu akornanneerusunnatik. Ilami inisimasuugatik namminneq ineqarusukkaluaqigamik, suliarorusuttarput nuannaarlutik qasuerlutillu.

*Ludvig Larsen* (siulersuisuunerit sinnerlugit): Siunnersuut ilalernarpoq SIK-mit nilliaatigisassatut, nuna tamaat eqqarsaatigalugu.

*Aqutsisoq*: Politikikkut sulissutigisassatut siulersuisuunerit suliaasaannut ilanngunneqarpoq.

**7.5.4 (Siulersuisuunerit)**: Nakkutillisoqarfiup 2026-mi Ilulissani ingerlanneqarnissaanut siunnersuut.

*Sofie Svendsen*: Siulersuisuunerit inassutigaat 2026-imi SIK-p ukiuni 70-inngortorsiorluni nalliuttorsiorneranut atatillugu Nakkutillisoqarfik 1. juuli aammalu 2. juuli Ilulissani ingerlanneqassasoq. Tamanna Hotel Arctic-imi pissaaq, tassa hoteli taanna isumaqatigiissuteqarfigigatsigu.

*Aqutsisoq*: Siunnersuut ataatsimeersuurtunit tapersorneqarpoq.

**7.5.5 SIP Maniitsoq**: Taaguut "immikkoortortaqarfik" atorunnaarlugu "peqatigiiffinnik" taaguisoqarnissaanik kissaatigisaq.

*Hans Heilmann*: Taaguut "immikkoortortaqarfik" kattuffiup nittartagaani suli atorneqartartoq maluginiarparput, naak tamatumunnga taarsiullugu taaguutip "peqatigiiffiup" atorneqarnissaa ataatsimeersuarnermi siuliani aalajangerneqarsimagaluartoq.

*Nuunu J. Jerimiassen* (siulersuisuunerit sinnerlugit): Taaguutit ukiorpassuarni atorneqarsimasut kakkuminaassinnaasarpur. Taamaattumik taaguutip aalajangiussap atorneqannginnera malugigaa-ngatsigu aqqiiniartassaagut.

*Aqutsisoq*: Nuunutut inerniliivoq. Kattuffimmi peqatigiiffinnilu malittarisassat il.il. atuarluarneqarnissaat kajumissaarutigaa.

**7.5.6 SIP Maniitsoq**: Ataatsimeersuarnermi siulersuisuunerit periusarisartagaannik unitsitseqqusut.

*Elisabeth L. Hansen*: Peqatigiiffiit siunnersuutaat namminneq siunnersuutiminnut / oqaaseqaatiminnut nikingaleraangata ataatsimiinneq unitseriarlugu ataatsimiittut aniseriarlugit siulersuisuunerit aqqissuisarneri unittariaqalerput.

*Qulutannuaq Berthelsen* (siulersuisuunerit sinnerlugit): Suleriaaseq taamaattoq sumiluunniit atornerqartarpoq.

*Aqutsisoq*: Ataatsimeersuarterut pisariaqartitsigunik aqutsisumut kissaateqarsinnaapput.

## 8. SIK-mi ilaasortaanermut akiliut

**8.1** Ukiuni tulliuuttuni marlunni ilaasortat kattuffimmut akiliutissaasa aalajangerneqarnerat.

*Peter B. Mølgaard* (siulersuisuunerit sinnerlugit): Ukiuni tulliuuttuni marlunni ilaasortat kattuffimmut akiliutissaattut siunnersuummik siulersuisuunerit tigusaqarsimanngillat.

## 9. Kukkunersiuusumik akuerisaasumik toqqaaneq

**9.1** Kukkunersiuusumik akuerisaasumik toqqaaneq.

*Siulittaasooq*: Siulersuisuunerit inassutigaat RI Statsautoriseret Revisionspartnerselskab ingerlaannaassasooq.

Tamanna ersaartaannikkut *akuerineqarpoq*.

## 9. Siulersuisuunissanik qinersineq

### **9.1. Siulittaasooq**

Siulittaasumut qinigassanngortinnissamut kingusinnerpaamik piffissaliusaaq nalliummat qinigassanngortittoq ataaseq nalunaarsimavoq, tassa *Jess G. Berthelsen*. Qinigassanngortinnerminut tunngavilersuutai ataatsimiissutissanut ilanngullugit nassiunneqarsimapput. Taamaalilluni qinigaavoq.

## 9.2. Siulittaasup tullia

<i>Qinigassanngortittut</i>	<i>Taasisut</i>
Sofie Svendsen	25
Benjamin Kielsen	14

Taamaalilluni *Sofie Svendsen* siulittaasup tulliatut qinigaavoq.

## 9.3. Siulersuisuunernut ilaasortat 7

<i>Qinigassanngortittut</i>	<i>Taasisut</i>
Benjamin Kielsen	28
Gaba Rosbach	15
Niels Wille	17
Jens Nuka Poulsen	23
Frederik Kristiansen	10
Pualuna Kivioq	20
Arne Møller	16
Alma B. Siegstad	12
Pele-Knud Mathiessen	12
Ane-Marie Havmøller-Jørgensen	18
Peter B. Mølgaard	16
Qulutannuaq Berthelsen	25
Nuunu J. Jerimiassen	23
Ludvig Larsen	17
Else Jonna Lange	21

Taamaalillutik siulersuisuunernut ilaasortanngorput taaneqarnerpaat arfineq-marluk (7) uku:

*Benjamin Kielsen, Qulutannuaq Berthelsen, Nuunu J. Jerimiassen, Jens Nuka Poulsen, Else Jonna Lange, Pualuna Kivioq aamma Ane-Marie Havmøller-Jørgensen.*

## 9.4. Siulersuisuunernut ilaasortat sinniisussaas 5

Sinniisussanngorput taaneqarnerpaat tullii tallimat (5) uku: 1. *Ludvig Larsen*, 2. *Niels Wille*, 3. *Arne Møller*, 4. *Peter B. Mølgaard* aamma 5. *Gaba Rosbach*. Taasisimikkut amerlaqatigiittut tulleriinneri makitsinikkut aalajangerneqarput.

## 10. Kukunersiuisumik akuerisaasumik toqqaaneq

*RI Statsautoriseret Revisionspartnerselskab* toqqaarneqarpoq ingerlaqqittussanngorlugu.

## 11. Taasariaqartut allat

Aalajangiiffigisassanik saqqummiussisoqanngilaq.

### Atsionerit:

Ataatsimeersuarnnermi aqutsisoq



Nukaraq Eugenius

Ulloq 16.11.2025

Imaqarniliortoq



Svend Møller

Ulloq 17.11.2025